

默
錢氏私誌
經筵玉音問答

王文正公筆錄
辯誣筆錄
梁谿漫志附錄



辯
誣
筆
錄

趙鼎撰

中華書局

辯誣筆錄

宋趙鼎撰

一、張邦昌僭竊干王時雍權京畿提刑。有新奉玉音之語。辯曰：靖康元年十二月末，德省劄稱朝夕大金師退，奉聖旨差府曹一項，省郎一員，抄劄遺下軍糧馬料。次日工部侍郎司馬文季與余簡封題云：提刑直閣經得開封通引官姓曰人劄探除目帖子報開封士曹趙某除直祕閣京畿提刑兼轉運副使。其日余在同舍陳士曹閣子內與數同官會話。今刑掾郭璋獨在，可以爲證。時十二月二十七八間也。先是開開正大金師退，宰相何文嶺廣坐中論師退後措置事，首言京畿蹂踐酷毒，須得人安集之。且言祖宗時止有提點一員，盡總諸司之事。俟師退，頒赦改正。今且除提刑一員兼漕事，當於士人中選通曉民事者，坐客薦洛州通判趙子昉。何曰：子昉固佳，但資淺爾，須於府漕省官中選之。程伯玉司馬文季等數人同聲曰：若求於省人官，無如開封士曹趙某者。何曰：得之矣。屢有人薦使除職名，卽呼中使具除日將上。次日批旨：正月初，畫黃下吏部戶部侍郎邵澤民聞之，走見何相，薦宮教耿洵，填士曹之闕。何曰：已除趙之防，蓋初議幾憲不成，復以此處之在外，無日下供職指揮。適當多事，舍人行詞，留滯未給告聞，車駕出郊，其事遂已。先被旨點檢出城骨肉，置局延真宮。二月初，天地大變，六宮皇族，宿繼取詣軍前。一日，宋退翁胡明仲過延真，率余同見府尹。時有金使二人來府中催促應副，退翁密謂余曰：瑤華當祝尹深藏之。

以備垂簾。待元帥之歸。余曰。何人可托。須有力量可保者。退翁曰。戚里王某。誅之子。內侍則邵成章。既見尹。適見使在坐。不容交談。退翁於掌上書瑤華二字。憑尹書几。展手示之。尹曰。何謂。退翁曰。藏之。尹良久。乃悟曰。會得會得。是日晚。退翁作劄子。詳言其事。託余達之於尹。瑤華舊在州北城破邊之延寧宮。未幾延寧火。尹議密歸之孟氏私第。不欲在士庶之家也。其後迎入禁中。垂簾以待元帥之歸。其謀實始於此。逮邦昌入城。士大夫亦以此議誘之。故邦昌敢任其責。三月末間。金人漸此引去。一日。舊同官呂言問見訪。云朝廷議迎請元祐后歸禁中。家兄令言問與孟氏議定。兄舜徒也。言問與孟子親故。舜徒委之言問。後作垂簾記。備見本末。後數日。余得行首司帖子。請召議事。至崇政殿門外。閣子中見王時雍。呂好馮。馮澥同坐。時雍顧謂余曰。煩公以畿內之事。出除目一紙示余。除直祕閣京畿提刑兼權轉運副使。余起立。白時雍。以私計不便。不願就此。時雍作色曰。今日之事。須大家擔負。余曰。府官冗賤。何預國論。時雍怒甚。不復言。舜徒恐激作禍生。謂時雍曰。且只以府曹兼權。又謂余曰。府界職事。府曹兼領何害。兼有正月初成命。余曰。若於差權劄子內。補坐正月初指揮。乃敢就職。時雍益怒。面色變青。徐取筆勾去直祕閣字。舜徒曰。日府界官無限。且先理會東路。祇備元帥之歸。所以煩公。正爲此也。余曰。聞金人留兵二萬屯河南武陽縣界。如此卽游騎四出。府界何以措手。舜徒曰。近遣從官數輩。至軍前懇告。今則盡發過河。更不留一人一騎在河南。余曰。東路蹂踐尤甚。直抵南都。更無片瓦。舜徒曰。元帥府官兵極多。須廣葺屋以徙。余曰。府界無一人百姓。使誰爲之。又無一錢支用。時雍方發言曰。此等事自當應副。公可條具申來。余歸。至

晚得差權劄子。猶豫未決。適提刑屬官孟某來參。不記名問知是后家。因叩呂言問所說。孟曰。此議已定。某適離家時。見街道司已在宅前治道。恐亦非晚矣。余既得此說。走見戶侍邵澤民。問子細。未及坐定。澤民曰。適自部中來。朝廷要二十副珠子花銀頭面。裝裹內人。就孟宅迎太后還內。於諸人家抄劄家資內尋覓。竟不得足。余曰。定在何日。澤民曰。數日前馬仲時。謂殿院馬仲已上書太宰相。謂速出外第。且乞遣使迎元帥。邦昌得書極惶恐。便欲出居東府。諸公謂敵騎尚有在青城者。恐別有變生。少隱忍數日爲便。今聞後騎已過中牟。邦昌豈敢一日留滯。當亟請垂簾。一如初議也。如遣使。則已發數輩。近又差謝任伯家。克寶而往。余曰。何寶。澤民曰。大宋受命之寶。的當無如此者。余既聞此。始敢交職事。幾憲公使造酒。月給甚厚。余只請士曹之俸。不受一錢供給。今料錢歷可考也。不數日。大母垂簾。邦昌易服出外第。垂簾之次日。余到都堂白事。適見邦昌自崇政殿門出。循廊而南。朱衣前導。堂吏隨之。三衙一人從後來。不知姓名陸階稟邦昌。欲差班直數人導衛。邦昌躡身頓足。大叫曰。公等如此不相卹。余見邦昌於都堂閣子。對坐茶湯。是時別無執政。前日暫權者。皆已退歸舊班。余出劄子。再申明所權執事。次日降太后聖旨。差權。余然後方敢舉職。又乞支降錢帛。前日王時雍所許者。邦昌謂余曰。要何用。余對以蓋造蓆屋。以備元帥之歸。邦昌取筆判衣支給。前章謂余干王時雍求京畿提刑。又謂余有親奉玉旨之語。則天地鬼神實臨之。一權京畿提刑日。糾集保甲。以拒勤王之師。辯曰。丙午冬。金人分兩路渡河。直抵畿內。西自洛陽。東至南都。南自潁昌。北至大河。皆爲金人占據。京師在數千里重圍之中。仰視但見青天白日。而路不通。中外

斷絕。四方萬里之遠。郡縣櫛比。官吏享厚俸。兵級坐食衣糧者。不可以數計。而優游自若。無一人回首一顧者。安得所謂勤王之師。月餘城破。敵分兵屯列城上。下瞰城中。百萬生靈。猶机上之肉。明年正二月間。陝西大帥范致虛遣兵萬人。使辛企宗將之。出崤崆敵。令西京所屯兵迎戰。甫交鋒。西京敗走。去京師猶在十程之外。東南之兵。聚之淮甸。盤桓不進。三月間。二聖已出郊。趙子崧總兵一項。自陳蔡稍逼咸平界。遠望敵騎數百。奔潰不可止約。自相蹂踐。死者盈路。遺棄金帛巨萬。不可數計。騎厚載而歸。此則勤王之兵也。時余在開封供職。不知京畿提刑者何人。謂之保甲者安在也。余得堂劄兼權憲漕。時敵退。城開已數日。逮交職事。敵騎已過鄭州。二帝北遷。渡河已久。京師官吏悉趨元帥府。所謂京師者數千里瓦礫場中。巋然一空城而已。何勤王之有。況保甲一司。自有武臣提刑專領。余權攝時。文臣見闕。係武憲汪長源兼領。余從長源交割得之。畿縣諸公悉來相見。不聞有保甲在京。亦未嘗說及也。隆祐垂簾之初。劉光世一項自鄜延來。太母遣武臣提刑汪長源。戶部郎官李革。出城迎待。而光世由潁昌境上直趨濟州。後數日。李革見訪。余始知光世之過也。後章謂余權京畿提刑日。糾集在京保甲以拒勤王之師。則天地鬼神實臨之。

余初被權攝指揮。專為措置東路。奉迎元帥。自權顧之後。往來雍邱陳留。水陸措置。朝廷差中書舍人張激達明提舉迎奉一行事務。余見達明議事。以驛頓什物全闕。次日得省劄。具數申戶部。許於諸人家抄割什物內關請。後到到載往東界。余至雍邱編排。回中路逢樞副李回寓少。右丞馮澥長源。同舟南下。相見舟中。

余謂二公論京畿蹂踐既酷。卽今猶有潰兵及饑民嘯聚者。時時出沒。流民不得安業。乞差兵彈壓等事。二公深然之。余遂率京畿父老上表勸進。五月初。上卽降。又率京畿父老上表請車駕還闕。至六月初。余申教省以京畿措置就緒。遠邇寧靜。勞來安集。恐非時暫兼權者能辦。乞早差正官前來交割。凡累申不報。方朝廷節次行遣。園城諸人議論洶洶之時。余敢露章求罷。而朝廷不聽其去。自以權攝始末。未可考。朝廷亦知之。而不以爲事也。兼權之人。凡有數等。除別以罪斥應權。執政官有自落職宮觀而復舊物者。皆責散置。李回。范宗尹。子流是也。有自樞副陞右丞者。馮澥是也。有自侍郎權尙書者。謝克家。邵溥是也。止於落職而已。有自從官權執政者。呂好問是也。事體爲量重。泊上卽位。正除執政。進退恩禮。未嘗少貶。以其權執政日。於園城中。寡人問道詣元帥府。密陳城中款師事狀之功也。其後宰相議園城之罪。悉欲殺之。上終薄其罰者。以預知城中始謀。權立之詳也。其自開封少尹。權都司者。葉份之徒是也。自監丞。權少監者。李佩之徒是也。自郎官。權卿少。自館職。權郎官。不能盡記。皆置而不問也。泊車駕渡江之後。洞照本末。當時權攝之人。悉皆召用。李回復入樞府。謝克家再爲尙書。相繼入參大政。范宗尹召爲中丞。未踰年。拜相。此皆權局中。情重而責降散置者。葉份元不離行在。至八座而去。余以開封右判官。權京畿監司。是爲外補。未嘗超躐。比之諸人。不猶愈乎。邦昌之入城也。留守率百官用郊迎。宰相禮見之於南薰門下。邦昌下馬。相揖入幕。次請從官就坐。邦昌厲聲曰。誰爲此謀。公等各爲妻子計。乃欲真邦昌赤族之地也。諸人惶恐無對。乃請邦昌居尙書省留守。司差從官十員。相伴遊說。邦昌拒之甚堅。余亦竊問一二。諸人初

謂邦昌曰。今日國祚不絕如線。太宰受國厚恩。正是論報之日。謂宜勉徇軍前之意。款退敵師。即日遣官奉迎元帥。一面邀請元祐后垂簾。然後退就舊班。且速議進。既建大號。未必不以為功也。邦昌曰。諸公誤矣。元帥府將相已備。他日聞二帝北遷。未必不便正位號。唐明皇在蜀。肅宗卽位靈武。投機之會。不可失也。諸人曰。才聞師退。急遣使勸進。此亦一機會也。且本謀專為社稷計。他時誰不相諒。邦昌曰。此事安可戶曉。諸公不念邦昌有老母乎。諸人又曰。今京畿百萬生靈性命所係。太宰設心如此。天地神明亦必知之。邦昌初慮師退之後。別生他變。既開垂簾之議。始有回意。後兩日。御史臺告報百官。并寄居待次官。及京城父老。諸軍將校。並赴尙書省。官員立廳上。父老將校立庭中。少頃。堂吏引邦昌出閣子。立柱廊上。士大夫建議紛紛。邦昌拒之。辭亦甚敏辯。其中一人謂衆曰。不須如此。便可山呼。邦昌倉皇走避。百官未退。余與府僚先歸。臺吏遮攔。且曰。一城百萬生靈性命。決於今日。官員門且更告他太宰。衆謂之曰。府中應副事冗。自來集議等事。才到便退。未嘗干與。乃使之去。出省門。逢王伯時立。小立語及邦昌建拒之說。伯時曰。須教他做。且是易制。他時足以襯刀。若使蔡京為之。必別有措置。反為大患。襯刀謂斬也。戶曹李沈曰。少卿且低聲。此語傳播。愈更艱難矣。初大變之後。敵以檄城中議所立者。云選世有名德之人。諸公議曰。衆所共知者。惟呂舜徒。司馬文季。又惜其忠賢之裔。萬一為敵所污。又見元祐之家。一事當求一易制。而不為人所顧惜者。如邦昌之流可也。邦昌久在軍中。與敵相熟。敵人之意。亦在於此。卽遣林學士吳正仲入城。取指名狀。城上四圍兵合。張其勢以逼之。日晚議未決。欲變生宋齊愈。預聞初議者。遂書邦昌

姓名以授之。軍中喻以此命。邦昌辭之甚哀切。以至號慟。悶絕仆地。扶歸帳中。不復食。敵遣甲士百餘人。路刃相向。且幹開口。灌以粥飲。而邦昌終不從。敵之謀臣曰。莫若送之城。中使自爲計。立一日限。事若不。成。縱兵齊入。不使一人得脫。故邦昌之入城。士庶軍民。祇哀萬種。議既定。有司告報百官。集闕門之外。敵使五人自南薰門入。甲騎千衛衛之。捧冊文前行。闕門等盡用敵人。邦昌乘馬出尙書省後門。大號於馬上。至御廊幕次。易服東望再拜。是時甲兵如雪。環列城上。鼓聲不絕。天日昏暗。風沙慘然。士大夫相顧。面無人色。邦昌亦揮洒不已。步自宣德西門入。敵使隨之。至殿門。五使先退。恐庭中禮數有所未盡。不欲見之。相回避也。邦昌陞殿。倚西壁立。百官隨入。錯雜紛亂。無復行列。邦昌遣闕門一人下殿。諭廷中曰。實爲生靈。本非僭竊。官員將校等。並不得拜。百官既拜。或起。或伏。仰視。邦昌依壁鞠躬。側首北嚮。殿中但設空御坐而已。先是被圍之初。有旨權罷國忌行香。邦昌禮數甫畢。次日。告報依舊制行香。但無奉慰之禮。以此示都人以見意也。後不復登殿。止坐升陽門。百官稟事。長揖階下。從官登門卽坐。但以字相呼。一如執政見士大夫之禮。事定。敵議退師。欲留兵三萬爲衛。邦昌懇辭之。又欲留兵一萬。屯河南武陽界。恐緩急京城要用。邦昌又辭之。既不敢留兵。所以急於迎奉隆祐還宮。敵退未旬日。太后垂簾。卽日召元帥勸進。權中書舍人汪藻行辭。有云。晉獻之子九人。獨文公之在外。漢家之業十世。至光武以中興。引證最爲切當。又旬餘。邦昌趨南都。上踐阼。封邦昌郡王。謝表云。姬旦攝成王之位。意在存周。紀信乘漢祖之車。本期誑楚。此其本意也。然其間舉措。不爲無失。如迎隆祐稱宋太后之類。敵其雖未盡渡河。敵聞之。有回戈之

患。後來誰肯委曲見察。賴聖君在上。憐其本心。故止及其身。而置其家不問。親族之家。亦不絕其祿仕。可謂忠厚之風。盛德之事矣。況如余攝庶官時。暫行兼權。未嘗超陞。未嘗增俸。么麼不足比數。宜其弗以爲罪。奈何怨家讎人。以此藉口。得肆其毒。增加緣飾。以無爲有。如親奉玉音。集保甲以拒王師之類。必欲置之死地。而卒蒙矜貸。獲保餘生。皆君父之賜也。

一、某謫潮陽。岳飛自岳鄂以金五萬貫贖行。某受之不辭。交結叛將。識者爲之寒心。辯曰。自渡江。諸大將與廟堂諸公並相往還。禮數唯遇生日。以功德疏。星香爲壽而已。岳飛後進。并生日禮數。亦復不講。某謫潮陽。庚申七月初一日。指揮也。初六日。得明州公文。繳到刑部牒。卽日上道時。岳飛在鄂州。相去二千餘里。何由道問。至當年十二月間。得飛一書。謝轉官而已。來人云。因過福州。張丞相處下書。蓋自福州至潮。由循海入江西。乃其歸路。某以通封公狀謝之。未嘗答一字。次年正月末間。又得一書。亦自福州經過。賀年節書也。某以謂既不答書。不必開看。亦以通封公狀謝之。并來書復付來人齎去。不曾開拆也。書且不留。何由有金五萬貫。以五萬貫之金。須用兩人擎擔。必不輕付。須有管押之人。今岳飛既死。無由考證。然天地鬼神。實鑒臨之。又邸報。坐到岳飛案款。在酉年春末。罷兵柄入樞府之後。飛發書來潮陽。在中年冬末。時獨總兵鎮上流也。謂之交結叛將可乎。況來書未嘗啓封復還之邪。且諸將總兵在外。每因職事。咨稟廟堂諸公。必有書答之。飛最遠。書辭最勤。已前有書往還者。皆謂之交結叛將可乎。此不待辯而可明者。以事體頗重。不得不一言也。

一士褒辛永宗赴闕。各有賄遺請求。辯曰。某戊午十月末罷政。知紹興府。冬至節。士褒以宗司瑞露酒十壺見餉。十二月得請奉祠。寓居能仁寺。過歲。某始生之日。褒又以十壺見贈。適淮上諸將送糴淮白數頭。兔犯十餘隻。鶴犯十數對。遂以白魚二頭作一合。兔犯二隻。鶴十隻作一合。復贈士褒。蓋所以爲答也。某是時杜門謝客。至正月末間。士褒遣其子不議來訪。某嘗差不議權浙東副官。故袂衣直入書院。見余云。大人被差朝陵。近催促甚急。緣腹疾未能起發。而舉市無附子。令稟覆。如宅庫有附子。覓數枚。某尋以附子十枚送之。此所謂賂遺也。二月初。士褒來相別。坐未定。謂余曰。昨日得臨安相知書云。相公差知臨安。非晚命下。某聞之駭然。謂褒曰。渴疾如此。公所親見。如何遠適。公赴闕。便當奏事。上不問則已。萬一問及。切告公以某所苦未愈。奏之。庶幾可免。此外別無一語。是晚。褒有簡借坐舡。至蕭山。某回簡謝之。因言適所奉懇。舉家休戚所係。幸公留念。蓋欲以疾苦奏知。此所謂請求也。又數日。辛永宗相訪。云被差京畿提刑。非晚前去。且言相公必有重擔子。與他擔負。聞已有消息矣。其言與士褒相符。聞之憂甚。亦謂永宗曰。公過闕。必對上不問。卽已。萬一問及。幸公以某疾苦未愈。奏之。永宗曰。會得會得。至如時遣之物。雖滴水無之。某平生立朝行己。自有本末。何至與此輩相往還。永宗挾舊怨。且以某在紹興府待之不以禮。故撰造此說。以相擠陷爾。如某以渴疾自引。至於再三。方蒙矜允。恩意深厚。禮數優渥。君臣之間。初無間隙。至奉祠養疾。尤荷眷顧之意。是時亦未有論擊者。不知所犯何罪。未委何爲請求。此不必質於天地神明。士大夫所共知。不待辨而明者。以其事近卑猥。故復言之。

一、盜用都督府錢十七萬貫。辯曰：某以甲寅八月初，除知樞密都督川陝荆襄軍馬，既正謝，奏乞先降錢一萬貫，通激賞。次日，朱丞相勝非將上進呈曰：「既開府，便要錢用，尋降錢一萬貫，付庫收椿，差使臣二人專監，屬官兩員提舉。凡一行公用什物之類，及使人出入間探之費，皆出此錢。收支請領，各有所司。畫一中乞入蜀犒軍，蒙支錢五十萬，十萬在庫藏，變易金銀寄椿，俟臨行交割。此物元不曾出庫。至九月末，留拜右相，泊扈從親征回途，以左藏庫寄椿錢五十萬，支付韓世忠，貼充大禮賞給。既兼諸路都督軍馬，府庫官屬不改，逐月請雜支用，及食錢之類，節次下左藏庫關請。二年之間，不過三二萬貫而已。自有提舉及監官主管收支文歷可考也。初以二相兼督府，一在內，一時出視師，謂之行府，有相專在外，凡朝廷應副督府錢物，盡歸行府，無慮千萬。而在內督府所總，止於前數，既無所管之錢，不知從何盜用。泊某再相，督府已罷，舊監庫使臣者，猶在密院，偶因事斥去，作處州兵鈐。後見言章有十七萬之說，郡中廣坐憤然厲聲，謂守倅等曰：「自初建督府，以至減罷，首尾監庫，唯某一人。若謂趙相私用庫錢一十七文，亦無之。某又不是趙相處得意之人，將某趕出來，事有不平，難爲忍受。人雖不知，某便不知，天地神明亦須知之。此語頗流傳也。此事初出於呂社，得於一要人達之之言者，前來章中，已有此事，要人之意，欲重人之罪，恐其復來爾。如親奉玉晉之語，及資善堂汲引親黨之謗，皆出於此。使某十年遷謫，百口流落，率由是也。某常謂怨嫌之禍小，忌嫉之禍深，自古皆然。怨嫌之禍，既釋卽已，忌嫉之禍，無有已時。此其可畏也。」

一、資善堂汲引親黨。乙卯春，資善堂既建，同列留身奏事，退謂某曰：「適得旨，傳令相公擇資善堂官一員。」

言才出口。某曰。今士人中學識淵源。人物蘊籍。可以爲師範。無如范冲者。此言應口卽答。未嘗出於思慮。當時止爲得旨擇人。若謂有他意。則皇天后土。實鑒臨之。退亦思之。恐涉嫌謗。又念古人內舉不避親之義。於是言於上。自信弗疑。不慮後患。此則某之罪也。命下范冲力辭。且言獨員終日在內。恐涉嫌謗。遂又進擬朱震二人更直。舉朝內外。皆以爲得人。後因臺諫諸人奏事。上盛談二人之賢。諸人奏曰。天生資善官。二人無與比者。翌日上以臺諫之言。語執政顧某。喜動天顏。某亦以此自喜。不知爲今日之患也。然又有一事。最爲切害。跡狀竊昧。無以自明。此所以摧心飲血。負屈銜冤。抱恨無窮。死且不忘也。某丁巳秋再相。適岳飛入朝奏事。翌日上曰。飛昨奏。奏乞立皇子。此事非飛所宜與。某奏曰。飛不循守分。乃至於此。退召飛隨軍。運使薛弼諭人曰。大將總兵在外。豈可干與朝廷大事。寧不避嫌。飛武人。不知爲此。殆幕中村秀才教之。公歸語幕中。毋令作此態。非保全功名終始之理。弼深以爲然。曰。當子細諭飛。且語幕中諸人。也。若謂某結飛使之爲此。寧肯使人諭止之。前譖者謂某汲引親黨。僥倖他日。後譖者謂某結飛。欲以兵脅朝廷。嗚呼。讒人之言。一何酷邪。此自古人君惡聞之者。殺身滅族之禍也。尙賴君父慈憐。得保首領。非其幸歟。萬一再見天日。當瀝膽披肝。一訴始末。然後退就鼎鑊。無憾矣。嗚呼。皇天后土。實臨鑒之。